

豫章叢書

第三八冊

明西江詩選

劉逢琛署

庚申五月刊

於南昌退廬

天開一代文明之治必篤生一代傑出之才工於述
作以鳴國家之盛然詩與文異趨而同歸人之精華
發而爲文文之神妙詠而爲詩皆至理妙道之形著
大則經天地明則昭日月幽則通鬼神植綱常扶世
教鋪張帝載藻飾休光咸賴焉詩之云者又豈嘲風
月弄花鳥誇耀烟雲侈人之諷詠而已哉實與文相
爲用於治化有補耳肆惟國朝誕膺景命奄有萬方
乾坤正氣之鍾毓醇儒碩輔之挺生大江以西號稱
最盛起而登臺閣列廟堂窮而遜山林栖草野以詩
鳴世爲海內所宗者聲光氣韻之輝映爰自洪武迄

今播傳於人手抄口誦無間窮簷陋壤然未有能類
次成卷以便觀覽用垂不朽者君子憾焉景泰壬申
春巡撫都憲姑蘇韓公永熙遍歷列郡考察之餘訪
求遺藁長篇短章諸體悉備屬憲副山陰韓公陽精
加選擇必體製足以垂範士林論述足以輔翼史氏
然後取焉否則雖工不錄復屬予校正并爲序壽梓
以傳竊惟詩者志之存緣情而作在心爲志發言爲
詩聲用律和律隨音奏古詩三百獎善懲惡嚴如秋
霜烈日及夫成孝敬厚人倫其感人也溫如甘雨和
風然一變而爲騷再變而爲選三變爲律爲歌行體

製雖有不同其所以理性情寓美刺獎善懲惡有補於風教一也況西江之詩盛自古昔唐以前無庸論矣宋則廬陵歐陽氏臨川王氏豫章黃氏諸先正相繼挺出以古學相高雅音正調足鳴當代之盛元則虞邵庵范太史揭文安諸君子高詞健筆雄視天下悉復盛唐之風我列聖相承儒風丕變至治崇文詩追古作今所選者純而正典而實雄深而不叢冗精妙而不粗疎龍蔚焉不流於纖巧渾厚焉不病於瑣碎誠一代傑作也又況俊邁光明之氣和平正大之音充足振凋弊洗腐陋敷昭代之弘休補史氏之放

失視昔有聲宋元者得不十倍其人乎今諸老雖已
淪沒然炯爛若星斗流峙如河岳黃鍾大呂音律鏗
鏘響徹霄漢之表者厯千萬古猶一日曷以存沒有
間哉其播今而傳後也宜矣余非知詩者世謂文章
莫難於詩信乎詩之難能也嗚呼大雅久不作正音
不復聞撫卷悵然徒興望洋願學未能之嘆謹述此
爲序用致高山景仰之意云景泰六年歲次乙亥三
月一日中憲大夫贊治尹大理寺右少卿廣信李奎
書

余巡撫江西之明年博采國朝江西諸故老之詩得若干帙屬按察副使韓陽伯易大理少卿李公文曜選而正之逾年始成既壽梓以傳而爲之序惟詩成文之音可以觀世而知政者也禮曰治世之音安以樂其政和亂世之音怨以怒其政乖而其風俗之美惡教化之隆替功德之盛衰皆可考焉故自三百篇以下一代之興必有一代之文人才士振其音以鳴于其時從而采之著爲一代之典章彰其休以垂永世稽諸載籍可見已我國家統一海宇光嶽氣完列聖相承仁義道德之薰陶復深且久故人才輩出聲

音大振自公卿大夫以至山林韋布能言之士皆足以追古作而西江稱文獻之邦藝文儒術之盛甲於天下作者尤多若是編之選其所以吟詠性情紀述事物頌歌太平雖體製不同而皆溫厚和平颯颯乎治世之音有以見風俗之美教化之隆與夫列聖功德之盛皆非近世所能及於乎休哉然西江一方耳所選僅百年耳而四海之大萬年之運奚止百千倍此況聖天子在位既頒五倫書君鑑以風天下又遣使纂脩方輿圖志將有所製誠制禮作樂之時也異時邇來選天下作者之什併斯集陳之著爲今之典

章被絃歌宣金石薦之郊廟施之燕射以似以續千
億萬年之久以彰國朝無前之休將必有同余心者
矣或者曰西江詩派有自來矣昔呂居仁作圖推黃
山谷爲祖列陳后山以下二十五人爲法嗣今之所
選抑皆嗣其派否乎余曰不然先儒論山谷之詩思
多輕浮后山之詩疎於叙事而所列其間亦有選擇
不精之辯今斯集所載固皆老師宿儒之作兼盛唐
諸家體製而肩摩踵接於今者視昔尤盛蓋宗三百
篇之派而頡頏李杜居多豈拘拘山谷后山而已耶
又曰詩之義大矣故選爲難知尤不易三百篇之後

固莫盛於李杜然不知者猶以優劣論之今之所選
果皆精而傳之天下後世能必其無優劣之論乎噫
此非余能盡知也擇而辯之尙有俟於知者景泰六
年乙亥春正月旣望賜進士出身中順大夫都察院
右僉都御史姑蘇韓雍書

文章關氣運盛衰謠詠知俗尚美惡肇自唐虞迨於
有周雖里巷愚夫愚婦皆能和音叶韻以言其情三
百篇是已漢魏晉唐以來作者體製靡一而用心莫
不至到其間或涉于玄虛或流於綺麗求可以紹夫
風雅者難乎其見也蓋有唐虞三代盛時之政治則
唐虞三代盛時之遺響可以復焉我皇明家六合垂
百年仁義治于民心禮樂陶乎民性氣運日隆文章
日盛俗尚之美政治之善駸駸肩乎三代康衢之謠
田野賡歌之什見于朝廷而和平正大之作非三百
篇可止嗚呼休哉西江賓海內名邦文獻爲東南之

最由晉歷唐由唐及宋才人迭出勝國時大著詩名者四人而三人出江右國朝以詩著名者非一人而江右居多適年奉勅撫巡茲上都憲姑蘇韓公政務之餘博詢洪武迄今已故諸公詩藁時遍閱之見其颯颯皆治世之音足以鳴國家之盛欲擇其純粹而可以羽翼風雅彙爲一集刊布四方爰以諸稿授愚俾遴選之愚以昏瞶妍媸莫辨固辭不獲已黽勉藁錄呈之于公而加去取焉公不鄙復命愚爲之引吁詩豈易言哉言之固難而知之爲尤難都憲公以英特之資博瞻之學文章功業炳耀于時且求道之心

不以位高名立而有忘雖祁寒暑雨卷不釋手其爲
諸公之作電矚一過美玉砮砮明珠魚目鑑別無遺
第所選者止於江右諸名公而山林韋布之士豈無
長篇大章詠歌盛治者乎惜一時莫能盡見亦未免
有掛漏之憾焉況四海之廣文章之富尙俟公他日
居聖天子左右以天下所貢之詩采選而爲皇明風
雅云景泰五年甲戌冬十月旣望會稽韓陽謹書

皇明西江詩選目錄

卷一

梁寅 二十九首

朱善 二十六首

劉伯序 十六首

劉崧 六十八首

朱夢炎 九首

胡季安 一首

卷二

王沂 二十三首

王佑 三十二首

解縉 三十六首

胡廣 六十一首

金守正 一首

金幼孜 三十一首

卷三

胡儼 八十二首

楊士奇 九十一首

吳溥 三十三首

卷四

鄒緝 十五首

朱彥昌 七首

胡敬方 一十一首

熊概 三十三首

羅養蒙 二首

羅汝敬 七首

蕭翀 二十首

卷五

曾槩 六十四首

李時勉 四十五首